

BOSNA I HERCEGOVINA
Federacija Bosne i Hercegovine
Tuzlanski kanton
GRAD GRAČANICA
GRADSKO VIJEĆE

Broj predmeta:

Broj akta:

Gračanica, _____ godine

Na osnovu člana 12. Zakona o prekršajima ("Službene novine Federacije BiH", broj: 63/14), člana 14. Zakona o javnom redu i miru ("Službene novine Tuzlanskog kantona", broj: 09/01, 11/01, 11/07, 14/11 i 05/21), Zakona o zaštiti od buke ("Službene novine TK", broj: 03/16) i člana 16. Statuta Grada Gračanica ("Službeni glasnik Grada Gračanica", broj: 01/23), Gradsko vijeće na sjednici održanoj dana _____ .2023. godine, donosi:

O D L U K U **o javnom redu i miru**

I - OPĆE ODREDBE

Član 1.

Ovom Odlukom propisuju se prekršaji kojima se povređuje javni red i mir na području grada Gračanica, koji nisu obuhvaćeni odredbama Zakona o javnom redu i miru, a čine ih pojedinci, privredna društva, organizacije, zajednice i udruženja građana, svojim postupcima i ponašanjem kojima se remeti normalan način života i rada građana, ometa mir, odmor i pravilno korištenje javnih objekata ili na drugi sličan način narušava javni red i mir, te propisuju sankcije za učinjene prekršaje.

Član 2.

Pod javnim mjestom u smislu ove Odluke podrazumijeva se mjesto na kome je slobodan pristup neodređenom broju lica bez ikakvih uvjeta (ulice, trgovi, javni putevi, izletišta, čekaonice, ugostiteljske, trgovinske ili zanatske radnje, sredstva i objekti javnog prijevoza i slično) ili pod određenim uvjetima (sportski stadioni i igrališta, pozorišne, koncertne i kino sale, izložbene prostorije i slično), kao i druga mjesta koja u određenom vremenskom periodu služe za ovakve svrhe (zemljišta ili prostorije u kojima se održavaju skupovi, takmičenja i slično).

Pod javnim mjestom smatra se i svako drugo mjesto dostupno vidiku sa javnog mjesta (balkon, terase, hodnici, dvorišta i slično) te stanovi u stambenim zgradama, kada se u njima ili iz njih narušava javni red i mir, u slučajevima posebno propisanim ovom Odlukom.

II - POSEBNE ODREDBE

Član 3.

Pod očuvanjem javnog reda i mira podrazumijeva se i zaštita od buke.

Zaštitu od buke osiguravaju vlasnici izvora buke. Zaštita od buke provodi se cjelodnevno - danju i noću.

Član 4.

Predviđeni nivoi buke ne smiju preći najviše dopušteni nivo buke utvrđen posebnim zakonom koji reguliše ovu oblast, a u skladu sa planiranim sadržajima i funkcijama u prostoru.

Član 5.

Zabranjeno je obavljati radove, odnosno djelatnosti koje zbog prekomjerne buke ometaju noćni mir i odmor u naseljenim mjestima, u vremenu od 22 do 06 sati u zimskom periodu i od 23 do 07 sati idućeg dana u ljetnom periodu.

Član 6.

Svaki građanin grada Gračanica ili druga lica koja na području grada Gračanica prikupljaju dobrovoljne priloge, moraju prethodno pribaviti saglasnost za obavljanje radnje prikupljanja prihoda od strane nadležne službe Grada Gračanica.

Član 7.

Prekršajima javnog reda i mira u smislu odredbi ove Odluke čine slijedeći postupci i ponašanja:

- 1) unošenje i točenje alkoholnih pića za vrijeme održavanja sportskih i kulturnih manifestacija u objektima ili prostorijama u kojima se održavaju ovakvi skupovi,
- 2) proricanje sudbine, tumačenje snova i bavljenje sličnim obmanama ili objavom oglasa ili na drugi način pozivanje ili podsticanje građana da se podvrgnu vraćanju ili proricanju sudbine ili pomaganje licu koje se bavi tim aktivnostima,
- 3) pomijeranje kontejnera i drugih posuda za odlaganje otpada sa mjesta koja su utvrđena od strane nadležnog organa ili odlaganje otpada mimo kontejnera i drugih posuda za odlaganje otpada,
- 4) okupljanje ili ulazak u napuštene ili privremeno neupotrebljive privatne ili državne objekte,
- 5) korištenje za sjedenje ivica trotoara, prostora i površina koje nisu predviđene za tu namjenu,
- 6) prodaja robe ispred prodavnica, kioska i ugostiteljskih objekata ili vršenje prodaje robe na trotoaru,
- 7) zlostavljanje ili na drugi surov i nehuman način postupanje sa životinjama na javnom mjestu, kojim se izaziva uznemiravanje i negodovanje građana, izazivanje ili podsticanje na borbu ili klanje životinja na javnom mjestu, izuzev u privatnim dvorištima ili baštama za vrijeme vjerskih praznika,
- 8) uvođenje ili omogućavanje uvođenja bilo koje životinje u ugostiteljski objekat ili drugi javni objekat, izuzev pasa vodiča za slijepce i slabovidne osobe,
- 9) držanje opasnih životinja na način kojim se može ugroziti život i zdravlje građana kao i neisticanje vidnih upozorenja na opasnost od takvih životinja,
- 10) držanje i vođenje opasne životinje i pri tome nepoduzimanje potrebnih mjera zaštite kako se ne bi ugrozila bezbjednost drugih lica (vezivanje i stavljanje odgovarajućih zaštitnih sredstava – brnjice, korpe i drugog),

- 11) ne poduzimanje potrebnih mjera od strane vlasnika na smirivanju domaćih životinja koje remete noćni mir građana u naseljenom mjestu,
- 12) pisanje i šaranje ili na bilo koji drugi način oštećenje zidova, fasada i prozora na javnim objektima, stubištima i zidovima stambenih, poslovnih, vjerskih, sportskih, kulturnih i drugih objekata,
- 13) stavljanje na zidove zgrada, ispred zgrada i ograde predmete koji mogu povrijediti ili uprljati prolaznike, kao i bacanje čaša, flaša, otpadaka i sličnih predmeta na javne površine,
- 14) stvaranje buke pojačanim radom motornog vozila, pokretanja vozila iz mjesta naglim povećanjem brzine što stvara prekomjernu buku i škripu usljed proklizavanja pogonskih točkova vozila (osim u slučaju opasnosti), prijevozom, utovarom i istovarom robe i drugih predmeta, upotrebom sirena, sječenjem i rezanjem drva i drugih drvenih i metalnih predmeta, odnosno upotrebom uređaja i aparata koje u svom radu koriste pravna i fizička lica prilikom obavljanja određene djelatnosti u vremenu od 22 do 06 sati zimi, kao i ljeti od 23 do 07 sati,
- 15) izvođenje muzike i upotrebljavanje uređaja za reprodukciju i povećanje jačine zvuka u ugostiteljskim objektima duže od radnog vremena koje je utvrđeno Odlukom o radnom vremenu, te u toku radnog vremena na način kojim se uznemiravaju građani na otvorenom prostoru ili u svojim stanovima, odnosno radnim prostorijama suprotno Zakonu o zaštiti od buke ("Službene novine TK" broj: 03/16),
- 16) kupanje na javnim kupalištima, bazenima, rijekama i potocima bez kupaće odjeće, kao i hodanje u kupaćoj odjeći u naseljenim mjestima,
- 17) uznemiravanje stanara ili građana očiglednim i svakodnevnim pravljenjem buke alarmnim i drugim uređajima, uznemiravanje građana izvođenjem muzike uživo ili uređajima za reprodukciju zvuka ispod prozora stambenih ili stambeno – poslovnih zgrada, na javnim površinama – mjestima bez odobrenja nadležnog organa ili suprotno tom odobrenju, uznemiravanje stanara upotrebom telefonskih uređaja, zvonceta ili interfona, kucanje ili lupanje na vrata stana bez potrebe, kao i radi prodaje razne robe, gatanje ili proricanje sudbine ili pružanje usluga koje nisu ugovorene ili naručene,
- 18) ulaženje preko reda i stvaranje gužve guranjem ili na drugi način na ulazima u prodavnice, kulturne i sportske objekte, vozila javnog prijevoza, prostorije državnih organa, javne ustanove, javna preduzeća i slično,
- 19) prskanje prolaznika vodom prilikom pranja ulica, pločnika ili dvorišta, prilikom zalijevanja vrtova ili travnjaka ili vozilom u pokretu, kao i bacanje grudvi snijega ili leda na građane, prolaznike i slično,
- 20) vršenje bludnih i/ili nemoralnih radnji na javnom mjestu,
- 21) gaženje, čupanje, lomljenje ili otuđenje sadnica cvijeća i drugog rastinja na javnim površinama,
- 22) iskakanje, izlazak ili naginjanje iz sredstava javnog gradskog prijevoza-saobraćaja dok je sredstvo u pokretu,
- 23) uništavanje javne telefonske govornice, javne rasvjete, PTT i elektro mreže, saobraćajnih znakova, oznaka na ulicama i putokaza, uređaja komunalne infrastrukture u parkovima, izletištim i igralištima i drugog,

- 24) lijepljenje plakata, parola i drugog promotivnog materijala na drveće, kao i lijepljenje plakata, parola i drugog promotivnog materijala koji su provokativnog karaktera,
- 25) neovlašteno ulaženje u ograđeni prostor i prostorije preduzeća i drugih pravnih lica, odnosno vršioca samostalne djelatnosti na način koji je suprotan pravilima njihove unutrašnje organizacije,
- 26) bacanje smeća ili drugih predmeta u rijeke, bazene, potoke i javne fontane,
- 27) izbacivanje otpadaka iz motornog vozila u mirovanju ili pokretu na javne i druge površine,
- 28) bacanje smeća ili drugih predmeta sa balkona zgrada i drugih objekata čime se ugrožava sigurnost lica i imovine,
- 29) paljenje smeća, guma, sekundarnih sirovina, kablova te drugog sličnog materijala u kontejnerima, dvorištima i drugim prostorima i na drugim površinama,
- 30) konzumiranje alkoholnih pića izvan ugostiteljskog objekta, na ulici, trgu, pijaci, autobuskoj stanici, u prevoznom sredstvu javnog saobraćaja, ispred trgovačkih radnji i slično,
- 31) nepoštivanje odluke o kućnom redu u stambenim, školskim i drugim zgradama i objektima, odnosno odluke o uslovima i načinu korištenja javnih dvorana i sportskih objekata,
- 32) točenje alkoholnih pića u ugostiteljskim objektima, kao i prodaja alkoholnih pića u trgovačkim radnjama osobama ispod 18 godina starosti,
- 33) klađenje i omogućavanje klađenja u sportskim kladionicama osobama mlađim od 18 godina starosti,
- 34) ležanje ili spavanje na ulici, putu, klupama u parkovima, čekaonicama, autobuskim stajalištima, pod mostovima i sličnim mjestima,
- 35) bacanje raznih materijala i predmeta (led, snijeg, snijeg i led u grudvama, kamenje i drugi predmeti) na prolaznike, vozila i druga prijevozna sredstva kojima se mogu nanijeti povrede i materijalna šteta,
- 36) ometanje invalida, izrazito starijih i iznemoglih lica, trudnica i lica sa djecom do šest godina starosti da ostvaruju pravo prvenstva pri ulasku u prodajne, kulturne, sportske i druge objekte, autobuske stanice i slično,
- 37) neovlaštena marketinška prodaja, suprotno internim odlukama o zabrani prodaje u javnim ustanovama i institucijama,
- 38) neovlašteno uklanjanje zaštita na otvorima za vodovod i kanalizaciju (poklopci šahtova i slivne rešetke) i nevraćanje na svoje mjesto od strane ovlaštenog radnika nakon izvršenog pregleda čime se dovode u opasnost građani (prolaznici),
- 39) pranje i sapiranje motornih vozila, te prosipanje motornih ulja na mjestima gdje nije predviđeno,
- 40) prodaja raznovrsne robe u blizini ili na raskrsnicama,
- 41) pružanja usluga pranja prozora, odnosno vjetrobranskih stakla na zaustavljenim vozilima u blizini ili na raskrsnici,

42) kupanje, prskanje ili pranje životinja ili ostavljanje nečistoća od životinja na javnim površinama ili javnim mjestima i objektima.

Član 8.

Za učinjeni prekršaj maloljetnika protiv javnog reda i mira propisanog ovom Odlukom odgovara roditelj, usvojlac, odnosno staralac maloljetnika koji je učinio prekršaj.

Član 9.

Policijska uprava Gračanica, odnosno Policijska stanica Gračanica, može zabraniti upotrebu sredstava za pojačanje zvuka u naselju na otvorenom prostoru, odnosno izvođenje muzike i upotrebu sredstava za reprodukciju i pojačanje zvuka u ugostiteljskom objektu, ako to zahtijevaju interesi javne bezbjednosti.

III - NADZOR

Član 10.

Nadzor nad provođenjem odredaba ove Odluke u okviru svoje nadležnosti vrše inspekcijski organi i nadležno Ministarstvo unutarnjih poslova u okviru svoje nadležnosti.

Nadzor nad primjenom odredbi koje se odnose na buku u periodu od 22 do 06 sati u zimskom periodu i od 23 do 07 sati u ljetnom periodu vrši Policijska uprava Gračanica, u skladu sa Zakonom o zaštiti od buke.

IV - KAZNE NE ODREDBE

Član 11.

Za prekršaje iz člana 3. stav 1. tačka 1., 2., 4., 5., 8., 11., 12., 14., 16., 18., 19., 20., 21., 22., 24., 25., 27, 30., 31., 34., 37., 39., 41. i 42. i člana 9. ove Odluke određuje se novčana kazna u iznosu od:

- 1) 100,00 - 300,00 KM za fizička lica (građani) i fizička lica - roditelje maloljetnika, staratelje ili usvojioce maloljetnika,
- 2) 200,00 - 500,00 KM za fizičko lice - imaoaca radnje ili obrtnika
- 3) 500,00 - 1.000,00 KM za pravno lice i
- 4) 100,00 - 300,00 KM za odgovorno lice u pravnom licu.

Član 12.

Za prekršaje iz člana 3. stav 1. tačka 7., 9., 10., 15., 17., 35. i 40. i člana 9. ove Odluke određuje se novčana kazna u iznosu od:

- 1) 150,00 - 400,00 KM za fizička lica (građani) i fizička lica - roditelje maloljetnika, staratelje ili usvojioce maloljetnika,
- 2) 300,00 - 1.000,00 KM za fizičko lice - imaoaca radnje ili obrtnika
- 3) 1.000,00 - 3.000,00 KM za pravno lice i
- 4) 150,00 - 400,00 KM za odgovorno lice u pravnom licu.

Član 13.

Za prekršaje iz člana 3. stav 1. tačka 3., 6., 13., 23., 26., 28., 29., 32., 33., 36. i 38. i člana 9. ove Odluke određuje se novčana kazna u iznosu od:

- 1) 200,00 - 500,00 KM za fizička lica (građani) i fizička lica - roditelje maloljetnika, staratelje ili usvojioce maloljetnika,
- 2) 500,00 - 2.000,00 KM za fizičko lice - imaoća radnje ili obrtnika
- 3) 2.000,00 - 5.000,00 KM za pravno lice i
- 4) 200,00 - 500,00 KM za odgovorno lice u pravnom licu.

Član 14.

Za učinjeni prekršaj iz člana 7. ove Odluke Sud ili službenici Policijske uprave Gračanica, u skladu sa Zakonom o prekršajima Federacije BiH i Zakonom o javnom redu i miru TK, mogu uz prekršajni nalog ili zahtjev ili neovisno od toga izreći i zaštitne mjere (oduzimanje predmeta prekršaja, zabrana obavljanja djelatnosti i drugo), a koje su propisane Zakonom o prekršajima Federacije BiH i Zakonom o javnom redu i miru TK, te odgovornom licu izdati potvrdu o oduzetim predmetima u slučaju oduzimanja istih.

V - ZAVRŠNE ODREDBE

Član 15.

Ova Odluka stupa na snagu osmog dana od dana objavljivanja u "Službenom glasniku Grada Gračanica".

**PREDSJEDAVAJUĆI
GRADSKOG VIJEĆA**

Mirzet Topčagić, sr.

O B R A Z L O Ž E N J E

Ovom Odlukom propisuju se prekršaji protiv javnog reda i mira, utvrđuju se odredbe u svrhu održavanja javnog reda i mira, prekršajne sankcije i nadzor nad provođenjem ove Odluke.

PRAVNI OSNOV ZA DONOŠENJE ODLUKE

Pravni osnov za donošenje ove Odluke je član 14. Zakona o javnom redu i miru Tuzlanskog kantona kojim je propisano da Općinsko/Gradsko vijeće može propisivati i druge prekršaje protiv javnog reda i mira, a koji nisu predviđeni ovim zakonom.

RAZLOZI ZA DONOŠENJE ODLUKE

Uzimajući u obzir činjenicu da se Zakonom o javnom redu i miru uređuje javni red i mir na području Tuzlanskog kantona, te da on propisuje samo prekršaje koji se odnose na cijeli Kanton, ukazala se potreba za donošenjem jednog podzakonskog akta kojim bi se propisali i prekršaji kojima se povređuje javni red i mir na području grada Gračanica, a koji nisu obuhvaćeni odredbama Zakona o javnom redu i miru.

OBRAZLOŽENJE DONESENIH RJEŠENJA

Odluka sadrži 5 tematskih cjelina, odnosno podijeljena je u 5 poglavlja, i to:

- I. Opće odredbe - utvrđene su 1. i 2. članom.
- II. Posebne odredbe - utvrđene su članovima 3. do 9.
- III. Nadzor - utvrđen je članom 10.
- IV. Kaznene odredbe - utvrđene su članovima 11. do 14.
- V. Završne odredbe - utvrđene su članom 15.

BOSNA I HERCEGOVINA
Federacija Bosne i Hercegovine
Tuzlanski kanton
GRAD GRAČANICA
Služba za prostorno uređenje,
geodetske i imovinsko-pravne poslove

Broj predmeta: 01-04-04459/3-2022
Datum: 20.03.2023. godine

I Z V J E Š T A J

o provedenoj javnoj raspravi na Nacrtu Odluke o javnom redu i miru

U skladu sa Zaključkom Gradskog vijeća Gračanica broj: 01-04-04459-2022 od 29.11.2022. godine provedena je javna rasprava na Nacrt Odluke o javnom redu i miru.

Poziv za učešće u javnoj raspravi upućen je vijećima mjesnih zajednica, Policijskoj upravi Gračanica, javnim ustanovama, javnim preduzećima, vlasnicima ugostiteljskih objekata i građanima da lično ili putem svojih organizacija, institucija ili drugih oblika organizovanja dostave svoje prijedloge, primjedbe i mišljenja na Nacrt Odluke. Poziv je istaknut na oglasnoj tabli Gradske uprave, na oficijelnoj web stranici Grada Gračanica te je svakodnevno emitiran na Radio Gračanici cijelo vrijeme trajanja javne rasprave.

Javna rasprava je trajala 60 dana odnosno do 31.01.2023. godine i u navedenom periodu pristigle su sljedeći prijedlozi, primjedbe i mišljenja:

I. POLICIJSKA UPRAVA GRAČANICA - dana 05.12.2022. godine stigao je dopis od Policijske uprave Gračanica sljedećim primjedbama:

"Poštovani, nakon upoznavanja sa Nacrtom Odluke o javnom redu i miru, primijetili smo nekoliko tehničkih grešaka, kao i potrebe za definisanjem nadležnosti za sankcionisanje pojedinih prekršaja.

Greške tehničke prirode:

- Članom 14. Zakona o javnom redu i miru TK-a propisano je "Općinsko/gradsko vijeće može, u skladu sa ovim Zakonom propisati i druge prekršaje protiv javnog reda i mira. (*U preambuli odluke navedeno članom 12. Zakona o javnom redu i miru TK-a*)"

ODGOVOR: prihvaćeno i izmijenjeno u Odluci

- "Poglavlje IV KAZNENE ODREDBE, član 13. - Za prekršaje iz člana 3. stav 1. tačka 1.,2.,3., i dr. (Prekršaji navedeni u članu 7. stav 1. tačka 1.,2.,3., i dr.). Na isti način izmijeniti član 14. i 15. (odnosi se na istu grešku)".

ODGOVOR: prihvaćeno i izmijenjeno u Odluci

Definisanje nadležnosti:

"Poglavlje III - NADZOR, član 12. Nadzor nad provođenjem ove odluke u okviru svojih nadležnosti vrše inspekcijски organi i nadležno Ministarstvo unutrašnjih poslova u okviru svoje nadležnosti.

Potrebno je definisati izričitu nadležnost inspeksijskih organa za prekršaje iz člana 7. stav 1. tačka:

- 3) pomijeranje kontejnera i drugih posuda za odlaganje otpada sa mjesta koja su utvrđena od strane nadležnog organa ili odlaganje otpada mimo kontejnera i drugih posuda za odlaganje otpada,
- 6) prodaja robe ispred prodavnica, kioska i ugostiteljskih objekata ili vršenje prodaje robe na trotoaru,
- 11) držanje životinja u naseljenom mjestu koje remete noćni mir građana, preformulisati
- 14) stvaranje buke pojačanim radom motornog vozila, prijevozom, utovarom i istovarom robe i drugih predmeta, upotrebom sirena, sječenjem i rezanjem drva i drugih drvenih i metalnih predmeta, odnosno upotrebom uređaja i aparata koje u svom radu koriste pravna i fizička lica prilikom obavljanja određene djelatnosti u vremenu od 16 do 18 sati i od 22 do 06 sati zimi, kao i ljeti od 23 do 07 sati,
- 26) lijepljenje plakata, parola i drugog promotivnog materijala na drveće, kao i lijepljenje plakata, parola i drugog promotivnog materijala koji su provokativnog karaktera,
- 33) nepoštivanje odluke o kućnom redu u stambenim, školskim i drugim zgradama i objektima, odnosno odluke o uslovima i načinu korištenja javnih dvorana i sportskih objekata,
- 39) neovlaštena marketinška prodaja, suprotno internim odlukama o zabrani prodaje u javnim ustanovama i institucijama,
- 40) neovlašteno izvođenje radova na instalacijama i postavljanje ili provlačenje novih instalacija u stambenim zgradama za čije je izvođenje potrebno odobrenje i saglasnosti nadležnog organa,
- 41) neovlašteno uklanjanje zaštita na otvorima za vodovod i kanalizaciju (poklopci šahtova i slivne rešetke) i nevraćanje na svoje mjesto od strane ovlaštenog radnika nakon izvršenog pregleda čime se dovode u opasnost građani (prolaznici),
- 43) prodaja raznovrsne robe u blizini ili na raskrsnicama.

Obrazloženje: Za gore navedene prekršaje prijavljene od strane građana policijskoj stanici Gračanica ili uočene od strane policijskih službenika biti će obaviještena nadležna inspeksijska služba koja će poduzeti mjere iz svoje nadležnosti."

ODGOVOR: Član 7. ostaje nepromijenjen i Policijska stanica Gračanica sve prijave za koje smatra da nisu njihova nadležnost prosljeđuje nadležnoj inspeksijskom organu i obrnuto.

"Potrebno je obrazložiti tačku 27. neovlašteno ulaženje u ograđeni prostor i prostorije preduzeća i drugih pravnih lica, odnosno vršioca samostalne djelatnosti na način koji je suprotan pravilima njihove unutrašnje organizacije (*način upoznavanja sa pravilima unutrašnje organizacije, navesti ulazak dozvoljen samo zaposlenima i sl.*)

ODGOVOR: Po prijavi neovlaštenog ulaska u ograđeni prostor i prostorije preduzeća i drugih pravnih lica, odnosno vršioca samostalne djelatnosti policijski službenici će ispitati okolnosti "neovlaštenog ulaska" te postupiti u skladu s tim.

"Član 9. Policijska uprava Gračanica odnosno, Policijska stanica Gračanica može izdati odobrenje za izvođenje muzike i upotrebu uređaja za reprodukciju muzike ili pojačala zvuka u naselju na otvorenom prostoru kao i u ugostiteljskim objektima, pod uslovom da jačina zvuka ne prelazi dozvoljenu buku i to:

1. U zatvorenim prostorijama i baštama ugostiteljskih objekata do kraja radnog vremena, a najduže do 23 sata u ljetnom, a u zimskom periodu do 22 sata,

2. U barovima do kraja radnog vremena,
3. Za vrijeme društveno-organizovanih manifestacija, državnih praznika, vjerskih obreda i drugih manifestacija može se izdati posebno odobrenje za izvođenje muzike do kraja radnog vremena.

(Potrebno je izmijeniti da gradski organi izdaju odobrenje uz mišljenje Policijske stanice, jer su Zakonom o zaštiti od buke FBiH, mjerodavna tijela za nadzor od 06 do 22 sata, uprave Federacije BiH, kantona, gradova i općina. Tačke 1.,2. i 3. ovog člana prilagoditi Odluci o izmjenama i dopunama Odluke o radnom vremenu u određenim djelatnostima, od dana 31.05.2017. godine."

ODGOVOR: Uvaj član je u cjelosti brisan iz Odluke jer je ova oblast uređena Odlukom o radnom vremenu i Zakonom o zaštiti od buke.

II. ADMIR GIROTIĆ - dana 15.12.2022. godine pristigao je email sljedećeg sadržaja:

"Zastita ucenika u osnovnim skolama u vidu ogradjivanje skolskih dvorista i onemogucavanje ulaza i prolaza autima. Primjer za to je Druga osnovna skola. Izgradnja lezecih policajaca pored skola na primjeru kako je to uradjeno kroz Tuzlu gdje vozila hitne pomoci neometano prolaze tako da to nebude izgovor da zbog hitne se nemoze to izgraditi. Kao i prijedlog da skole dobiju mogucnost uvodjenja zastitarskog osoblja u svoj kolektiv."

ODGOVOR:

- Osnivač osnovnih škola je Vlada TK i u njihovoj je nadležnosti donošenje propisa koji se odnose na uređenje školskih objekata i školskih dvorišta. Mi sa nivoa gradske uprave ne možemo propisati dužnosti i obaveze višim nivoima vlasti.
- Projektom horizontalne i vertikalne saobraćajne signalizacije na području MZ Gračanica predviđeno je da se urade usporivači brzine kod Druge osnovne škole. Javna nabavka je provedena, izabran je izvođač i čekaju se povoljnije vremenske prilike da se projekat i realizuje.
- Uvođenje zaštitarske službe u objektima osnovnih škola takođe je u nadležnosti viših nivoa vlasti (Kantona) i ovom odlukom to je nemoguće propisati.

III. EDIN OMERČIĆ - dana 20.01.2023. godine pristigao je email sljedećeg sadržaja:

"Produžiti radno vrijeme i trajanje muzike zimi do 12h ljeti do 1h".

ODGOVOR:

Ovom Odlukom ne propisuje se radno vrijeme ugostiteljskih objekata niti "trajanje muzike" u ugostiteljskim objektima. Odlukom o radnom vremenu propisano je radno vrijeme pojedinih ugostiteljskih objekata, a izvođenje muzike uživo ili putem uređaja za reprodukciju tretirano je Zakonom o zaštiti od buke ("Službene novine TK", broj 03/16) i ova Odluka je morala biti usklađena sa pomenutim zakonom.

IV. LARISA ŠUŠA - dana 23.01.2023. godine pristigao je email sljedećeg sadržaja:

"Načelni prijedlozi i mišljenje na nacrt akta ili dokumenta:

PRIJEDLOG IZMJENE I DOPUNE NA "NACRT ODLUKE O UPRAVLJANJU JAVNIM REDOM I MIROM" Poštovani, Mi vlasnici ugostiteljskih objekata upućujemo izmjene i dopune na nacrt odluke o upravljanju javnim redom i mirom objavljenoj na stranici grada u sklopu javnog poziva za javnu raspravu 19.01.2023. godine. U sklopu javne rasprave predlažemo izmjene i dopune na objavljeni nacrt odluke, te vas molimo da uvažite naše prijedloge kako slijedi... Predlažemo sledeće izmjene :

U dijelu nacrtu odluke o upravljanju javnim redom I mirom da se izvrše izmjene koje na naš prijedlog glase :

1. "II - POSEBNE ODREDBE " izmjena i dopuna "član 3" na naš prijedlog glasi: Član 3 Pod očuvanjem javnog reda i mira podrazumijeva se i zaštita od buke. Zaštitu od buke osiguravaju vlasnici izvora buke. Zaštita od buke provodi se cjelodnevno - danju i noću. U smislu ove odluke tokom cijele godine (u zimskom i ljetnom periodu) dan traje od 06 do 24 sata, a noć od 24 do 06 sati radnim danom (ponedjeljak, utorak, srijeda, četvrtak). U periodu vikenda (petak i subota) tokom cijele godine (u zimskom i ljetnom periodu) dan traje od 06 do 02 narednog dana uz obavezu ugostitelja da i za period vikenda (petak i subota) od 01 do 02 pristupe stišavanju muzike do konačnog zatvaranja ugostiteljskih objekata. Za svaku nedjelju primjenjivati će se pravila jednaka za radni dan gdje dan traje od 06 do 24 sata, a noć od 24 do 06 sati.

2. "II - POSEBNE ODREDBE "izmjena i dopuna "član 7" "stav 1" na naš prijedlog glasi: Član 7. Prekršajima javnog reda i mira u smislu odredbi ove Odluke čine slijedeći postupci i ponašanja: 1) unošenje i točenje alkoholnih pića za vrijeme održavanja sportskih i kulturnih manifestacija u objektima ili prostorijama u kojima se održavaju ovakvi skupovi, izuzev ukoliko se radi o posebnim događajima i organizacijama za koja se izdaju i posebna odobrenja gradske uprave na zahtjev organizatora, a što će biti regulisano posebnim rješenjem/odobrenjem gradske uprave . Obrazloženje: Na različitim manifestacijama kulturnog i društvenog značaja (organizacija turnira, Disko 40+, pozorišne predstave I slično), često smo u prilici proslavljati pobjede, upriličiti zakuske i prijeme u sklopu različitih događaja gdje se direktno ili indirektno ugostitelji pojavljuju sa svojim ponudama što podrazumijeva i ponudu alkoholnih pica po već regulisanim pravilima organizatora. Po ovom stavu bez dodatnog preciziranja u prostorijama ili na području organizacije različitih dešavanja svi se tretiramo kao da kršimo zakon.

3. "II - POSEBNE ODREDBE "izmjena i dopuna "član 7" "stav 16" na naš prijedlog glasi: 16) izvođenje muzike ili upotrebljavanje uređaja za reprodukciju i pojačanje zvuka u baštama ugostiteljskih objekata u vremenu od od 24 do 06 sati radnim danom (ponedjeljak, utorak, srijeda, četvrtak i nedjelja) i od 01 do 06 sati vikendom (petak i subota) tokom cijele godine (u zimskom i ljetnom periodu), osim za vrijeme manifestacija koje se organizuju povodom državnih i vjerskih praznika, održavanje javnih priredbi i izvođenje takvog programa na otvorenom prostoru i drugim prostorima, uz odobrenje nadležnog organa.

4. II - POSEBNE ODREDBE "izmjena i dopuna "član 9" na naš prijedlog glasi: Član 9. Policijska uprava Gračanica odnosno, Policijska stanica Gračanica može izdati odobrenje za izvođenje muzike i upotrebu uređaja za reprodukciju muzike ili pojačala zvuka u naselju na otvorenom prostoru kao i u ugostiteljskim objektima, pod uslovom da jačina zvuka ne prelazi dozvoljenu buku i to: 1. U zatvorenim prostorijama i baštama ugostiteljskih objekata do kraja radnog vremena, a najduže do 24 sata tokom cijele godine, 2. U barovima do kraja radnog vremena, 3. Za vrijeme društveno-organizovanih manifestacija, državnih praznika, vjerskih obreda i drugih manifestacija može se izdati posebno odobrenje za izvođenje muzike do kraja radnog vremena. U odobrenju iz prethodnog stava navesti će se rok važenja i mjere koje korisnik mora preduzeti radi održavanja javnog reda i mira i zaštite od buke. Policijska uprava, odnosno Policijska stanica Gračanica može izdati odobrenje iz stava 1. ovog člana staviti van snage, ako se njegov korisnik ne pridržava propisa o javnom redu i miru ili propisa o zaštiti od buke.

5. III - NADZOR Član 12. Nadzor nad provođenjem odredaba ove Odluke u okviru svoje nadležnosti vrše inspekcijski organi i nadležno Ministarstvo unutarnjih poslova u okviru svoje nadležnosti. Nadzor nad primjenom odredbi koje se odnose na buku u periodu od 24 do 06 sati tokom cijele godine radnim danima (ponedjeljak, utorak, srijeda i četvrtak) i nedjeljom,

odnosno od 01 do 06 sati u danima vikenda (petak I subota) vršiti će i primjenjivati Policijska uprava Gračanica, u skladu sa Zakonom o zaštiti od buke.

Primjedbe na pojedine članke ili dijelove nacрта akta ili dokumenta (prijedlog i mišljenje): *Obrazloženje na sve prijedloge: Uzimajući u obzir da smo mi uposlenici i vlasnici ugostiteljskih objekata u proteklom periodu pandemije najdirektnije bili ekonomski, financijski, sociološki i zdravstveno pogođeni posljedicama pandemije. Najdirektnije smo bili konstantno izloženi dodatnim troškovima i ulaganjima u poslovanje zbog potrebe povećanja mjera prevencije, a paralelno smo imali smanjenje poslovanja uzrokovano posebnim odredbama i ograničenjima, te iz svega navedenog smatramo da u periodu bolje epidemiološke situacije trebamo dobiti šansu za nadoknadu izgubljenog. U pogledu interesa razvoja i poboljšanja društvenog života u našem gradu prethodnim odlukama bili smo oštećeni mi vlasnici i uposleni ugostiteljskih objekata, kao i naše građanstvo koje je željno opuštanja, produženja ponude zabavnog sadržaja, u odnosu na ponudu okruženja. Naši sugrađani su redovno nakon 23 sata odlazili iz našeg grada/mjesne zajednice Gračanica i zabavu tražili na drugim opštinama /mjesnim zajednicama/gradovima u kojim iza 23 sata imaju zagarantovanu zabavu. Na ovaj način mi smo gubili prihode, a građani specijalno mlađi punoljetnici vozarenjem u kasne sate u potrazi za zabavom bili su izloženi dodatno nepotrebnom ugrožavanju sigurnosti. U nadi da ćete u interesu naših ugostiteljskih objekata, uposlenih i vlasnika istih, a ponajviše u interesu boljeg i dužeg društvenog života za naše mlade uvažiti gore navedene prijedloge i sugestije unaprijed vam se zahvaljujemo. U ime grupe vlasnika ugostiteljskih objekata prijedloge sačinili: Larisa Šuša (061/732-931, larisa_susa@hotmail.com) i Edin Omerčić (061/946-789, info@timesquare92.com)".*

ODGOVOR:

- 1. Zakonom o zaštiti od buke, članom 7. propisano je da se zaštita od buku provodi cjelodnevno - danju i noću, te je precizno navedeno od kada do kada traju dan i noć, pa je zbog toga nemoguće ovom Odlukom drugačije uređivati tu oblast.**
- 2. Tačka 1. u članu 7. ostaje nepromijenjena jer predlagač odluke smatra da alkoholnim pićima nije mjesto na sportskim i kulturnim manifestacijama.**
- 3. Tačka 16. u članu 7. je brisana jer je radno vrijeme ugostiteljskih objekata propisano posebnom odlukom o radnom vremenu, a uslovi za izvođenje muzike i korištenje uređaja za reprodukciju i pojačanje zvuka propisani su Zakonom o zaštiti od buke (član 14. i 15.).**
- 4. Član 9. je brisan u cjelosti iz istih razloga koji su navedeni u prethodnoj tački.**
- 5. Član 12. ostaje nepromijenjen jer je Zakonom u zaštiti od buke propisano trajanje dana i noći.**

V. OTVORENI SASTANAK - Otvoreni sastanak sa predstavnicima vijeća mjesnih zajednica, Policijske uprave Gračanica, javnih ustanova, javnih preduzeća, vlasnicima ugostiteljskih objekata i građanima održan je 26.01.2023. godine u 14.00 sati u Multimedijalnoj sali Grada Gračanica - nova zgrada Gradske uprave na drugom spratu. Na otvorenom sastanku bilo je više prijedloga, primjedbi i mišljenja i sva su se odnosila na produženje radnog vremena ugostiteljskih objekata, te produžetak vremena u kojem bi im trebalo biti dopušteno emitiranje muzike u otvorenim i zatvorenim objektima. Pošto se radno vrijeme ugostiteljskih objekata propisuje drugim pravnim aktom (Odluka o radnom vremenu), a vrijeme u kojem se smije izvoditi i reproducirati muzika u otvorenim i zatvorenim objektima propisano je Zakonom o zaštiti od buke, nije moguće udovoljiti gore navedenim zahtjevima.

VI. SLUŽBA CIVILNE ZAŠTITE - dana 14.03.2023. godine pristigao je email sljedećeg sadržaja:

"U članu 7. Tačka 14. Nacrta Odluke o javnom redu i miru iza riječi motornog vozila, dodati tekst: " pokretanje vozila iz mjesta naglim povećanjem brzine što stvara prekomjernu buku i škripu usljed proklizavanja pogonskih točkova vozila, osim u slučaju opasnosti".

ODGOVOR: Primjedba je prihvaćena i tačka 14. sada glasi: "stvaranje buke pojačanim radom motornog vozila, pokretanja vozila iz mjesta naglim povećanjem brzine što stvara prekomjernu buku i škripu usljed proklizavanja pogonskih točkova vozila (osim u slučaju opasnosti), prijevozom, utovarom i istovarom robe i drugih predmeta, upotrebom sirena, sječenjem i rezanjem drva i drugih drvenih i metalnih predmeta, odnosno upotrebom uređaja i aparata koje u svom radu koriste pravna i fizička lica prilikom obavljanja određene djelatnosti u vremenu od 22 do 06 sati zimi, kao i ljeti od 23 do 07 sati"

ŠEF SLUŽBE

Aida Hodžić dipl. ing. građ.